

民國鄭縣志

上冊

民國鄭

蘇州工業學院圖書館
藏書章

上册

周秉彝 修 劉瑞璘 纂

李紅岩 校點

重修鄭縣志議

民國四年

副貢常掄元郡人

議得鄭縣地當孔道，邑處衝繁。值滿清入關之後，遭明季兵燹之餘，故府典籍，悉付灰燼。知州何公錫爵收合散亡，續成一書，始於康熙三十一年秋七月，成於康熙三十二年春三月，綱舉目張，燦然大備。乾隆元年，知州張公鉞、何公源洙、董公蓉，郡人毛公汝詵復經重修，參互考訂，越六年而工竣。自是厥後，失修者百九十年。其間天地鍾靈，山川毓秀，風微人往，潛德不彰，微顯闡幽，後學有責。欣逢縣長江北通儒，中州循吏，臨漳修志，曾稽古而右文；榮澤下車，復考風而問俗。蒞鄭兩載，訟理政平，近又徵輯文獻，纂修清史，雖爲史館資料，實開鄭志先聲。紳等伏查鄭縣文獻徵輯處經理劉君瑞璘，作史長才，留心掌故，數月以來，纂成文獻廿餘萬言，學貫典墳，文通中外，以之編纂鄭志，實堪勝任愉快。失此不修，恐老成日益凋謝，往事終歸湮沒。紳等再四思維，議在高等小學校設局編輯，公推劉君瑞璘爲總纂，兼管編輯事項，分編輯、測繪、書記等項，臨時規定七區社長、紳學兩界，均爲義務採訪。俟編輯告竣，即行刊板印刷。所有議設鄭志編輯局大概情形，是否有當，理合稟懇立案。

重修鄭縣志序

邑之有志，所以重鄉土之觀念，備史氏之徵輯也。人莫不有鄉，人莫不自愛其鄉。鄉有善，與己無干也，見之則樂，聞之則喜，與人言則津津焉，唯恐其不詳；鄉有惡，與己無干也，見之則怒，聞之則戚，與人言則忸怩而不忍道。此固出於好惡之公，而實愛其鄉之深且摯也。至其鄉之流風遺俗，潛德幽光，或撫其陳迹，或觀其文字，輒流連感慨，不能已之於懷，於是秉筆直書，而一邑記載之事出焉。近世大夫往往侈談瀛海而不知故里山川，搜輯古史而不知百年近事，非其性之獨殊也。舍近圖遠，易於動人聽聞，而且荒渺難稽，未必遽蒙指摘。至於父母之邦，釣游之地，平昔所深愛而不能釋者，渺然無所記述，是何操術之相左也。

今年冬，鄭縣知事王君幼侯、鄭志編輯局劉君瑞璘，以續修告成，馳函索序，并寄示首卷於余，余略觀大要，知鄭志於此蓋三修矣。夫修志豈務著述之名哉！亦本鄉土之觀念，而懼先哲昔賢淹沒弗彰。若夫人情俗尚之變遷，形勢封疆之沿革，土宜物產之盈絀，人文風化之轉移，在在胥關緊要，莫爲之志，懼弗傳也。鄭自有清之季，迨民國肇造之初，十載之中，郡縣變置已再而三。更上溯之宋、明以前，與漢、晉、隋、唐之際，其存沒分合，有非空言所能者。遑問夫祝融故墟，東虢舊治，

桓公、武公之經營締造，子產、子太叔之後先輝映也乎。今則京漢、隴海兩路軌縱橫交貫，舉從前之山川隘塞，咸變換其險夷而不可復識，不急志之，後欲從事纂修，無可藉手矣。不料劉君瑞璘等竟於風鶴頻仍〔一〕之後，滄桑屢變之餘，遠紹旁搜，克尋墜緒，則劉君之厚愛其鄉爲何如也。邇者汝南人士亦有以修志相商者，余樂於贊同而未遑將事。不謂劉君乃先我而爲之，故不敢以不文自辭，而爲之弁言於篇首。

民國五年歲次丙辰十二月，河南督軍汝南趙倜序。

校記：

〔一〕風鶴頻仍，原書漏一『仍』字，據成語補。

重修鄭縣志序

鄭爲春秋時古鄭國地，自秦犁天下爲郡縣，歷代改革，而鄭嘗爲州，隸開封府。民國元年，制定省治爲兩級，復以天下州郡改爲縣，故鄭今以縣稱。其地當南北之衝，自古稱爲繁盛。前清末葉，軌道銜結，商民輻輳，財賦薈萃，其繁盛尤逾於昔時。余以丙辰秋來樵中州，取道京漢，鄭爲入境首邑。甫下車，親見其地繁盛，極思與士大夫之賢者詢其土風之美，人物之盛，以及禮教之淳厚，政治之良善，與夫因革之所宜，利病之所在，得有考焉，以資治理。而鄭之人士劉君瑞璘等續修新志，適以書來請序於余。余維簿書鞅掌，不親文事者數十年，自愧不克應諸君之請。惟考鄭志，一修於順治，再修於康熙、乾隆，迄今蓋百有九十年矣，未有從事於志者。而諸君懼其曠廢久，且人事湮郁而不彰也，何以承前而繼後？於是聚一邑之俊彥，博采周諮，考訂編纂，凡八閱月而志成。嗚乎盛矣！余既嘉諸君之志，而因得鄭之風土人物、禮俗政教、因革利病，以及其繁盛之所由來，知守土者與邦人士之相得而爲治也。吾將取以風教他縣，又烏可以不文辭？顧志者，記也。所以記一邑之事，而成一省之治；記一省之志，而成國家之史。國史者，所以集天下之志而成之者也。方今史館宏開，馳書四出，徵求天下文獻，將以成開國之信史，而垂億萬祀之大鑒。

而鄭志適成，然則諸君之爲是志也，足可備國史之採擇，則又非僅余之樂觀鄭志之成，而以之資一邑之治已也。

民國五年十二月，河南財政廳長桐城王荃本序。

重修鄭縣志序

《詩》亡然後《春秋》作，作《春秋》所以繼《詩》之亡也。史亡然後志書作，作志書所以繼史之亡也。國有一統志，省有通志，縣有邑志，東西各國莫不列其人物風土，編爲歷史，以廣流傳。例如《周禮》小行人之職，以萬民之利病、禮俗、政教、刑禁、順逆爲一書，太史氏掌之，非徒供博覽也。俾天下之爲公僕者，知其民情，辨其利弊，克充人民圓滿之希望而已。丙辰秋，余權篆管城，檢閱鄭志，創修在順治十五年，繼修在康熙三十二年，迨乾隆二年，知州張鉞、郡人毛汝詵重修，繼任何源洙賡續告成，迄今百九十年，殘缺殆甚。民國四年提議徵採，五年設局編輯，是則周前任秉彝所有事，而揚瀚今日所踵而行之者也。鄭在豫省著名衝繁，鐵路交通，官商雲集，官斯土者，居則治簿書兼審判，出則具酬應送過客，饑渴寒暑之弗恤，又遑發篋陳書，爲之拾遺而補缺乎？幸郡人劉君瑞璘以名進士肩任總纂，舉人馬雲從等分任編輯，余於公牘之暇從事參訂，勸付剞劂，數閱月而刻竣。然後鄭志之絕者續，錯者正，十八卷之全書於是乎成。凡天文、輿地、建置、食貨、禮樂、風俗、秩官、自治、選舉、人物、列女、藝文各等卷，井井有條，朗若列眉，庶前志之殘缺者不至湮沒，後志之踵事者有所考訂。是書也，以爲後海先河乎？應之曰：

『可。』以爲守先待後乎？應之曰：『亦可。』繼自今以往，存儲必得其地，職掌必得其人，凡欲爲他日續修計者，又豈可不於是書加之意乎！余謏陋不文，不敢比博物君子。是書之成，殆賡續周前任之意，如州牧何源洙賡續前任張鉞故事，爲東里邑乘作討論修飾之結果云爾。

民國五年歲次丙辰十一月既望，知鄭縣事武昌王揚瀚序。

重修鄭縣志序

天地之變，愈變愈奇；世界之變，愈變愈精；政治之變，愈變愈新。執圓以求方，鑿枘不相入也；泥古以準今，時勢不相同也；舍己以從人，中外不相類也。習慣猶舊，法制維新，欲成一書而枚舉之，貫串之，爲一郡之史乘，作北門之管鑰，不其偉歟，不其難歟！鄭雖編小，實居天下之中。其封域，則梅、泰、廣武、大河、汴水所環峙也；其人材，則周、秦博物，漢、唐耆英所薈萃也；其文物，則草創討論，修飾潤色所表彰也；其交通，則京漢、汴洛、隴秦、豫海所輻輳也。居衝握要，通商惠工，循是不輟，當有可與天津、上海并駕爭衡之勢。余不文，嘗從事扶溝縣志。丙辰冬，由鹿邑調任鄭縣。郡人大文學家劉君瑞璘，以鄭志全稿示余，余嘆曰：『此杰作也，百九十年少有爲之者。自古作史難，作志尤難，蓋總核始末，鑒別去取，非可率爾爲也。』余於政務之暇，披閱數次，不揣固陋，詳加參訂，凡天文、輿地、建置、食貨、禮樂、風俗、秩官、自治、選舉、人物、列女、藝文群分類聚，壁壘一新。爰於冬十一月在鄭志編輯局開會審查，勸付梓人，父老應之曰：『善。』雖然余爲邦之人士進一說焉。《易》曰：『窮則變，變則通。』《論語》曰：『齊一變至於魯，魯一變至於道。』西人亦以研究歷史爲改良社會不二法門。際此過渡時代，

亞雨歐風，捲天蓋地，非刷新政治，萬萬不能生存。但教育未加擴充，智識尚屬淺薄，往往欲辦一事，甲派贊成，乙派反對，急於脫化，及致退化。循序漸進，未有不登峰造極者。余家北陳，去鄭二百餘里，柝相聞，壤相接，風俗相同，雖曰忝握鄭篆，以鄉誼論實桑梓也。凡有建設，知無不爲，總求不悖舊習，漸趨新法，庶幾合乎窮變通久之大要也。然則是書之成，雖不敢居班馬之例，未始非齊變至魯，魯變至道之方軌。而東里改良，管城歷史之一助云爾。

民國五年歲次丙辰季冬上旬，知鄭縣事扶溝縣王光第序。

重修鄭縣志序

甲午之役，予差次美陽，得讀康對山《武功縣志》，愛不釋手。甲辰，改選燕趙，奉北洋大臣命，赴東洋考查政治，得讀黃公度《日本國志》，豁心爽目，寢食與俱。對觀兩書，極深研究，凡采其歌謠，詢其民俗，編之行人，掌之太史，所以察民情、崇民意者，既如此其詳且盡也。民國成立，歸賦卷懷，檢閱鄭志，殘缺有間。計自乾隆乙丑，州牧張公鉞、何公源洙、董公蓉、郡人毛公汝詵重修後，迄今百九十年，無人續志。鄭雖褊小，素號衝繁，近者鐵路交通，人物輻輳，若聽其湮沒，未免興華黍由笙之歎也。四年春，政府設立清史館，通告各省徵輯文獻。吾鄭同人四出採訪，三閱月而蒞事。縣長周君海六提倡修志，同人推予爲編纂，予以固陋辭。同人曰：『嘻！子過矣。必有康對山而後可以志武功，必有黃公度而後可以志日本？世界上之紀載，恐將無人下筆矣。』爰於五年春三月設局編輯。凡天文、輿地、建置、食貨、禮樂、風俗、秩官、自治、選舉、人物、列女、藝文，舊日案卷，夕陽碑碣，詢厥父老，訪之縉紳，罔不搜而集之。八閱月而編纂竣。王君幼侯，以大法政家莅任縣事，詳加參訂，亟付棗梨。舊志爲類凡九，茲增爲類十二。舊志爲卷十二，茲增爲卷十八。余見東洋士夫能讀中國之書，談中國之事，中國士夫好

談古義。日本與我僅隔一衣帶水，視之若海外神仙，可望而不可即。維新而後，世之所謂新人物者，則又崇拜外人，忘却祖國，詢以故土鄉風，如汴宋之於幽燕，直隔十重雲霧。由前之說，故見自封，是失之隘；由後之說，新學自命，是失之誇。無惑乎吾國日日改良，而國計民生未見其進步也。是書也，不敢居著述之列，竊願吾鄉之講文學者，放大其眼光，注意其桑梓，治內安外，兩不偏廢，未始非泰山土壤、河海細流之一助云爾。

中華民國五年歲次丙辰冬十一月，壬辰進士，歷任陝西醴泉、華陰、咸寧、同官、直隸樂城等縣知縣，東里劉瑞璘序。

民國鄭縣志目錄〔一〕

上冊

首卷……………一

職名 凡例 各圖

第一卷……………三五

天文志

角宿 亢宿 角宿雜座 亢宿雜座 角宿占候 亢宿占候

祥異

第二卷……………四四

輿地志

沿革 疆域 形勝 山川 岡阜 陂澤 溝洫 堤防

古迹 陵墓

第三卷……………五九

建置志

城池 公署 黌宮 學校 坊表 街衢 壇壝 祠廟

集鎮 七區屯砦 倉廩 郵政 郵政 營堡 橋梁 各機關

第四卷……………一〇二

食貨志

戶口 地畝 田賦 漕米 雜稅 鹽引 國家款 地方款

灘地 土產

第五卷……………一二七

禮樂志

慶賀 南郊祀天禮節 迎春 耕藉 先農壇 孔廟禮節

關岳廟禮節

第六卷……………一五九

風俗志

正月朔日	立春	上元	二月二日	二月十五	三月清明
三月十八	三月二十	立夏	四月八日	五月五日	芒種
六月六日	立秋	七月十五	七月三十	八月十五	九月九日
霜降	十月一日	立冬	冬至	十二月八日	十五日
二十三日	除夕				

第七卷……………一七一

秩官志

知州縣知事附 同知裁 州判裁 吏目管獄員附 學正訓導縣視學并文廟奉祀

官附 管城驛裁 名宦 城守營警務長警備隊附

陰陽學 醫學 僧正司 道正司

第八卷……………二二六

自治志

參事會	議事會	七區保衛團	區議事會	區董事會	教育會
公款局	商務會				

第九卷……………二四〇

選舉志

進士 舉人 貢生 保舉文、武職 武進士 武舉 封爵

蔭襲 學校畢業 議員

第十卷……………三一三

人物志

名賢 孝子 忠義

下冊

第十一卷……………三五九

人物志

政事 耆德 善行 文學 武功 隱逸 方技 流寓

仙釋

第十二卷……………四〇三

列女志